

Attachment 6

Gin opre i paramiča taj khel la e ávrenca.

Pa loulo ropaj

Sas jejkh papu taj mámi. Bešenas ando cigno kher taj sas le vi cigni bár. Taj jekhvar žal o papu andi bár te dikhel, sar bárol leske o loulo ropaj. Taj dikhel, hoť majnem maj báro-j sar o kher. Mindár nášlas palaj mámi te phenel lake: “Mámi, av maj, dikh andi bár. Bárilas amenge nađon báro ropaj. maj báro-j sar amáro cigno kher”. I mámi šutas tejle i krejtinca taj žal te dikhel. Taj kana i mámi dikhlas, sar-i báro o loulo ropaj, phendas: “Papu, so kerasa? Av žutin ma, cirdas les ávri.” Cirdel o papu, cirdel i mámi taj cirden, cirden, taj či b́irin te cirden les ávri. Taj i mámi phenel pale e paposke.” So kerasa?” O papu phenel lake palpále: “Av žas kharas e žukeles. Žukel, žukel ká sal? Khate sim, haf haf. Av žutin ame, cirdas o loulo ropaj ávri. Ame či b́irinas. Mišto-j.” Cirdel o papu, cirdel i mámi, cirdel o žukel taj cirden, cirden taj či b́irin te cirden o loulo ropaj ávri, Taj i mámi phenel pale e paposke: “So kerasa? O papu phenel lake palpále: Av žas kharas a muca. Muca, muca, ká sal? Khate sim, mňou, mňou. Av žutin ame, cirdas o loulo ropaj ávri. Ame či b́irinas. Mišto-j.” Cirdel o papu, cirdel i mámi, cirdel o žukel, cirdel i muca taj cirden, cirden taj či b́irin te cirden o loulo ropaj ávri., Taj i mámi phenel pale e paposke: “So kerasa?! O papu phenel lake palpále:” Av žas kharas a ša. Luludńinka, Luludńinka, ká sal? Khate sim, mámi taj papu. Av žutin ame, cirdas o loulo ropaj ávri. Ame či b́irinas. Mišto-j.” Cirdel o papu, cirdel i mámi, cirdel o žukel, cirdel i muca, cirdel i šej taj cirden, cirden taj či b́irin te cirden o loulo ropaj ávri. Taj i mámi phenel pale e paposke: “So kerasa?” O papu phenel lake palpále:” Av žas kharas e šimijákos. Šimijáko, šimijáko, ká sal? Khate sim. Av žutin ame, cirdas o loulo ropaj ávri. Ame či b́irinas. Mišto-j.” Cirdel o papu, cirdel i mámi, cirdel o žukel, cirdel i muca, cirdel i šej, cirdel o šimijáko taj cirden, cirden taj ekcere tejle peren. O loulo ropaj ávri line. Sa keťii sas, sa kezdinde te asan. Taj i mámi gejlás te kiravel zumi pa loulo ropaj. Kana má kiradi sas, šutas sakoneske andá la. Nađon láši sas taj ízívo

Taj dikhes, kodo maj cigno žutindas e ávren. Te či aviloun khote, či b́irindoun te len ávri o loulo ropaj. Taj kadej-i vi maškar ame. Ko si o maj cigno, šaj avel vi maj báro.



Paj trín báloura

Sas jejkh bálengi dej taj sas la trín bále. Kana bárile, bišadas le i dej andi luma te keren penge khera, ká bešna. Taj phendas lenge te len aminti po nasul vadno žukel. Sa e trín bále rakhle penge than, ká kerde penge khera. O angluno bálo sas nađon rešno taj phendas peske, hoť kerla pesko kher anda sulum. Kadej avla les nađon sigo kerdo kher. O dújto bálo kamelas feri te pihenij taj phendas peske, hoť kerla pesko kher andaj kašt. O trito bálo, kodo sas o maj god'aver, žanelas, sar te kerel pesko kher andaj tejgji. Sar dikhlas o nasul vadno žukel, so kamen te keren e trín bále, phendas peske, hoť viďázija le so kerna. Kamelas te xal le. Kana e trín bále line sáma, hoť nadúr si o nasul vadno žukel, so kamel te xal le, nášle andej penge khera te garađon. O vadno žukel cipindas po angluno bálo, taj kana či das les ánglal, zuráles phurdas taj o kher anda sulum gejlaz síjel. Taj o bálo, kana kado dikhlas, mind'ár nášlas ká o dújto bálo. Taj kana kado dikhlas o vadno žukel, cipindas po dújto bálo, taj kana či das les ánglal, pizdas ando kher taj o kher andaj kašt gejlaz síjel. Taj e bále, kana kado dikhle, mind'ár nášle ká o trito bálo. Nađon daranas. O trito bálo phenelas lenge te na daran. Muro kher si nađon mišto kerdo. O vadno žukel či bírija te phagel les. Taj vorta sar phendas kadi vorba, dikhel, hoť o vadno žukel si pi střexa taj dikhel pér le tejle. Taj kana kado dikhlas o trito bálo, kerdas jag. O thuv čípázijas e vadne žukeleske e jákha, hoť musaj sas te nášel-tar. Taj má šoha či avilas palpále.